



**Enformaziuns en cört dal Consei Pastoral** (sontada dai 29.04.2021)

- **Ores d' adoraziun:** en Pasca de Ma y Festa dal Cör de Gejú, do messa cina ales 10:30 chi da Curt, dales 10:30 ales 11:30 La Pli y Pliscia adöm; lõnesc de Pasca de ma atira do messa en n'ora por düc.
- **Comegnun ala jont atompada:** en Pasca de Ma, Festa dal Cör de Gejú y en Santa Maria dai ciöf él ministri dla Comegnun co ti porta la Santa Comegnun te ciasa ala jont atompada. Chi co ess ienn sce al ti gness porté la Santa Comegnun cöstes festes y chi co se dejidress che signor ploan jess, vigne pröm vendres, a proverer (olache al ne va nia ciamó) é peries da se anunzié cina ai 15 de ma pa Veronica, ☎ 348 6926843.
- **Gran messa:** dla domegna do Pasca de ma sará la gran messa dla domegna sön paiun.
- **Ministri dla Comegnun:** ai 20 de ma, do messa da sera, tignará signor ploan en curs de repetiziun por i chi co deida partí fora la Santa Comegnun.
- **La pissia dla Joneza** gnará tignida en vendres ai 21 de ma ales 19:30.
- **La pissia dai scolari** (elementara y mesana) sará en sabeda ai 22 de ma ales 8:00.
- **La Pröma Santa Comegnun** sará ai 26 de setember, la sabeda denant la pröma pissia.
- **Corones por i defunc:** les corones co ven dites te dlíja sará sen dagnora **ales 19:00!**
- Al ven motü sö en **grup de laur** por laoré fora la calogna: Jan Agreiter, Jep Agreiter, Patrick Complojer y Lois Taibon.
- Le consei é a òna da vene en toch de grunt fora Pliscia a Berto Kastlunger.

**1 Enformaziuns y termins**

**Sorvisc ai Jogn/1:** en dedolõnesc ai 11 de ma, dales 15:30 ales 17:00, vegnel tigní la "**Consulenza tal marcé y tal monn dal laur**" con Giorgio Costabiei. La consulenza é debann y sön prenotaziun (✉ info@jogn.org o ☎ 0474 523070). An podará baié singlarmonter con le consulent.

**Sorvisc ai Jogn/2:** pa i "**Dis de preparaziun al maridé**", organisés ai 29 y 30 de ma él ciamó la poscibilitá da se scrí ete cina en jöbia, ai 13 de ma (☎ 0474 523070). Le curs co ven tigní por ladin (a pert le referat dla efom Julia Cappelletto, co sará por todesch) prevèiga referac y formaziun tai ciamp dla comunicaziun, relaziun, spiritualité, sanité y dert. Le cost é de € 180,00 (curs + 2 iadi marena).

**Bancarela dal mangé:** al ven lascé alessei che la Bancarela dal Mangé a Al Plan á orars nös. Ara é sen daverta vigne vendres dales 9:30 ales 10:30, tal local dal Zenter Families Mareo (sot la scora mesana). Porsones co á alisiraziun da avei en pü' de speisa debann, pó ienn gní adalerch. Chi co ne sciafia nia o stonta da gní, pó telefoné al ☎ 333 4762010, spo i vegnel condüt a ciasa.

<b>Döt le bun a:</b>	Jep Rindler	* 03.05.1938
	Anna Taibon Pedevilla	* 04.05.1932
	Trebo Peter, <i>Bornech</i>	* 06.05.1940
	Albert Rubatscher	* 12.05.1946
	Irma Daporta Barth, <i>Graz</i>	* 13.05.1923
	Giovanni Nepomuk Agostini, <i>Valsperch</i>	* 15.05.1932
	y a düc chi co á santennom y complessc i agn cöst'edema	

**Impressum:** Ploania d'La Pli; redaziun Franz Rigo y Edith Willeit  
**Comunicaziuns:** cina le **dedemesaledema** sera a Franz Rigo, ☎ 0474 500978 o ✉ ploania@gmx.net  
**Download plata:** [www.unitepastorala.org](http://www.unitepastorala.org)



Plata dla Ploania  
**La Pli de Mareo**  
 Santa Maria dal Bun Consei

Ploan: Signor Klaus Sottsas  
 ✉ klsottsas@rolmail.net

Calogna Al Plan: ☎ 0474 501006  
 Radio de Ploania: 93,00 MhZ



**VAL BADIA**  
[www.unitepastorala.org](http://www.unitepastorala.org)

Ann B

09.05.2021 - Sesta domegna de Pasca

n. 24

**Os seis mi amisc**

☞ **St.Ap 10, 25–26.34–35.44–48 | 1 Jan 4, 7–10 | Jan 15, 9–17**

**Dal Vangelo do San Jan:**

Te chel tomp á Gejú dit a sü discepu: <sup>9</sup>Desche le Pere m'á orü bun, ensciö ves á ince iu orü bun. Romagnede te mio amur! <sup>10</sup>Sc'i osserveis mi comandamonc, romagneise te mio amur, desco iu á osservé i comandamonc de mio Pere y romagni te so amur. <sup>11</sup>Cösc ves á dit, por che mia ligreza sii te os y por che osta ligreza sii plena. <sup>12</sup>Cösc é mio comandamont: Orésse bun önn al ater desche iu ves á orü bun. <sup>13</sup>Al n'é nia n maiú amur co sce önn dá ca söa vita por sü amisc. <sup>14</sup>Os seis mi amisc, sc'i fajeis ci ch'i ves dá sö. <sup>15</sup>I ne ves diji nia plü fanc, deache le fant ne sa nia ci che le patrun fej. I ves á dit amisc, ciodich'i ves á comuniché döt, ci ch'i á aldí dal Pere. <sup>16</sup>Nia os ne m'eis chirí fora, mo iu ves á chirí fora y ves á destiné ch'i jeise y porteise früt y che osc früt romagni. Spo ves dará le Pere döt do ci ch'i le perieis te mio ennom. <sup>17</sup>Cösc ves comani: Orésse bun önn al ater!

**I ponsun do:** *Al ô dí trep sce Gejú se dij amisc. En amich é deplü cozacai che an conesc ma por cajo. Sce önn é por me en amich spo sái: él mo sta dlungia, iu mo dá da fá por el, el pó se tralascé sön mia afeziun y sön mio aiüt. Desco amisc de Gejú Crist sanse: el dá ca döt por nos y se defenn; mo ince nos stun da söa pert.*

**I periun:** *Bel Dio, tō s'as scinché l'amizizia de to Fi. Mena jō to Spirit sora de nos ch'i s'orunse bun önn al'ater desche tō s'os bun. Por Crist, nosc Signur.*

Vesco Wilhelm Egger "Sonntagsbibel"



☞ **Letöres dla Gran festa dl'Ascensiu dal Signur - Palsacrusc:**  
**St.Ap 1, 1–11 | Ef 1, 17–23 | Ef 4, 1–13 | Mc 16, 15–20**

Edema liturgica dai 09.05. ai 16.05.2021

<b>DOM 09.</b>	<b>Sesta domegna de Pasca</b> <b>De dla Oma</b> 08:30 <b>gran messa</b> por dōta la ploania <b>3<sup>a</sup> s.m. de sopoltōra</b> por † Berta Comploi, Framacia <b>s.m.</b> por † Emma Frontull ved. Ellecosta, Bastl → <b>corona dla comunité</b> por † Berta Comploi, Framacia 10:00 <i>s.m. a Al Plan</i>	<i>Beatus, Tarejia</i> <i>oferta por la ploania</i>
<b>Lön 10.</b>	<i>lob, Damian de Veuster, Gordian y Epimach</i> → 19:30 <b>funziun de ma</b> , <i>arjignada ca dal'Uniun dles Eres</i>	
<b>Ded 11.</b>	<i>Walter, Iachin, Gangolf</i> 07:30 <b>s.m.</b> do entenziun dla familia Franz y Lidia Rigo, Matlogn <b>s.m.</b> d'aniversar por † Iuliana Maneschg Erlacher, Plaza <b>funziun a Santa Maria</b>	
<b>Dem 12.</b>	<i>Pancraz, Nereus y Achilleus, Imelda</i>	
<b>Jöb 13.</b>	<b>dles Crusc</b>   <i>memoria de Santa Maria da Fatima, Servaz</i> → 06:00 <b>prozesciun fora Sares</b> , danló <b>s.m.</b> en onú de Santa Maria	
<b>Ven 14.</b>	<b>dles Crusc</b>   <i>Bonifaz, (Matia apostul)</i> → 19:30 <b>prozesciun fora Pliscia</b> , danló <b>zelebrazion dla Parora de Dio</b>	
<b>Sab 15.</b>	<b>dles Crusc</b>   <i>Sofia, Sonia, Isidor, Friedrich</i> → 07:30 <b>s.m. prozesciun a Curt</b> ( <i>danló degüna messa</i> ) → 09:00 <b>s.m.</b> en onú de Santa Maria con les prozesciuns dla bassa Val Badia ( <i>sön paiun</i> ) 18:00 <i>s.m. prefestia a Al Plan</i>	<i>grup dal cor</i>
<b>DOM 16.</b>	<b>GRAN FESTA DL'ASCENSIUN DAL SIGNUR</b> <b>PALSACRUSC</b> <b>De mondial dai mesi de comunicaziun soziai</b> 08:30 <b>gran messa</b> por dōta la ploania <b>s.m.</b> d'aniversar por † Paola Pedevilla Maneschg, Col Marchet <b>s.m.</b> por † Edoard Maneschg, Col Marchet 10:00 <i>s.m. a Al Plan</i>	<i>Johannes Nepomuk, Adolf</i> <i>oferta por la ploania</i> <i>grup dal cor</i>
<i>ampola:</i>	do entenziun de na familia	

*ministronc:*

- **dedolönesc y sabeda:** Tobias y Lisa
- **jöbia y domegna:** Roman y Florian



Dan Santa Maria

Oma de bunté y de misericordia,  
i vegni plen de confidanza da te.  
I conscidri l'ejompl de töa vita  
y i te preii,  
deidemo ince me da vire  
mia vita tal Spirit de Gejú, to Fi.  
Dámo töa umilté da laldé  
y rengrazié Idio l'Onipotent  
por söes opres de salveza.  
Dámo töa devoziun  
co chir söa vijinanza  
y töa atenziun  
daverta a söa parora.

Dámo töa desponibilité  
da fá söa orenté  
y töa generosité  
da se meter a sorvisc.  
Dámo töa pureza  
co scombat le picé y le mal.  
Dámo töa forza y pazionza  
co la ten fora ince sot la crusc.  
Oh bona uma,  
dámo dantadöt to cör credont,  
to cör plen d'amur y de dediziun.  
Santa Maria, tö compagna de mia vita,  
condüjemo söle tru da Chel Bel Dio.  
Amen. *do "Gotteslob"*



“Con Ojep da Nazaret fora por cösc ann y fora por nosta vita” (4)



**I invocun Ojep desco patron dai ei y dai peri:** che i ei y peri fej ci co ti aspeta, ne ti sciampi nia ales responsabilités y ne manci nia danló, olá che ai é adorés. Tan atuala che ara é la figōra dal "vardian" y dal „protetur“ – dantadöt sce ara se trata de mituns y jont jona, de söa dignité, so svilup y sü derc. “Le monn adora i peri, mo al refodeia chi co sá ma da comané sora i atri por emplí so öt; al refodeia chi co fej confujiun danter autorité y autoritarism, ...” scrí Papa Francesch te söa letra sora Sant Ojep. La “festa dal pere” ai 19 de merz pó nes recordé l'emportanza dai peri y ei te nostes families, tla sozieté y tla Dlijia; na sozieté olá che al mancia la figōra dal pere porta a de gragn defizic – nia ennultima ince por le svilup religius de mituns y joneza.



Festa dla oma

„Deache Chelbeldio ne sciafia nia da ester endlunch, ál cherié les omes”, dij n proverb arabich co sotlineia la gran emportanza dles omes por vigne singola porsona y por la comunité. Önn n de al ann é tre massa püch, por dí iolan de cösc. Le filosof franzeje Albert Camus scrí: “**La oma é la prōma fontana dal amur ch'i podun sontí y tres chel ch'i emparun enstesc da amé. Porchel iolan! Vignedé!**”